



REPUBLIKA E SHQIPËRISË  
MINISTRIA E ARSIMIT  
DHE SPORTIT  
MINISTRI

*M. 8175/1 prot*

*dt. 04.11.2014*

**RREGULLORE**

**PËR**

**ZHVILLIMIN E OLIMPIADAVE KOMBËTARE NË ARSIMIN PARAUNIVERSITAR**

**Neni 1**

**DISPOZITA TË PËRGJITHSHME**

Kjo Rregullore përcakton rregullat për zhvillimin e olimpiadave kombëtare në arsimin parauniversitar, si dhe përcakton institucionet shtetërore dhe strukturat arsimore përgjegjëse dhe bashkëpunuese për realizimin e këtij procesi.

**Neni 2**

**PËRKUFIZIME**

*Në këtë rregullore termat e mëposhtëm kanë këto kuptime:*

1. MAS - Ministria e Arsimit dhe Sportit;
2. DAPU - Drejtoria e Arsimit Parauniversitar;
3. UT - Universiteti i Tiranës;
4. IAL - Institucionet e Arsimit të Lartë;
5. ISHA - Inspektorati Shtetëror i Arsimit;
6. "Shkollë 9 vjeçare" - nënkupton shkollë të arsimit bazë, publike dhe/ose private;
7. "Gjimnaz" - nënkupton shkollë e mesme e përgjithshme, publike dhe/ose private;
8. AKP - Agjencia Kombëtare e Provimeve;

- 9. NJAV- Njësi Arsimore Vendore (DAR dhe ZA)
- 10. DAR - Drejtoria Arsimore Rajonale;
- 11. ZA - Zyra Arsimore;
- 12. PA- Përgjegjës Administrimi;
- 13. AS- Administrator Sekretimi.

### Neni 3

#### DETYRAT E MAS DHE INSTITUCIONEVE ARSIMORE

Olimpiadat organizohen, drejtohen dhe menaxhohen nga MAS, institucionet e saj të vartësisë, si dhe në bashkëpunim me Universitetin e Tiranës.

### Neni 4

#### VENDI QË ZENË OLIMPIADAT NË AKTIVITETIN SHKOLLOR

Olimpiadat janë veprimtari të cilat kanë për qëllim të nxisin punën me nxënësit dhe të nxjerrin në pah prirjet dhe talentin e tyre në lëndë të veçanta. Në këto veprimtari marrin pjesë të gjithë nxënësit e arsimit parauniversitar të shkollave publike dhe/ose private që plotësojnë kriteret dhe kushtet e përcaktuara në Dispozitat Normative dhe në këtë Rregullore.

### Neni 5

#### LËNDËT NË TË CILAT ZHVILLOHEN OLIMPIADA

Olimpiadat zhvillohen në arsimin bazë dhe në arsimin e mesëm të lartë:

- a. Në arsimin bazë zhvillohet olimpiada e lëndës Matematikë për klasën IX.
- b. Në arsimin e mesëm të lartë zhvillohen olimpiadat për lëndët; Matematikë, Fizikë, Kimi, Biologji, Informatikë, Gjuhë letërsi, Histori dhe Gjeografi.

### Neni 6

#### PROCEDURA E ZHVILLIMIT TË OLIMPIADAVE KOMBËTARE

Olimpiadat kombëtare zhvillohen në tri faza: nivel shkolle, nivel Njësie Arsimore Vendore (DAR/ZA) dhe në nivel kombëtar, sipas Udhëzuesit vjetor të miratuar nga MAS.

- I. **Faza e parë** zhvillohet në nivel shkolle. Në fazën e parë marrin pjesë nxënës të cilët kanë të paktën 8-të notën vjetore të klasës paraardhëse në lëndën ku do të marrin pjesë në olimpiadë. Kjo fazë zhvillohet sipas këtyre procedurave:

- a. DAR/ZA-të, hartojnë testet e olimpiadave. Në çdo shkollë ngrihen komisionet për administrimin dhe vlerësimin e testeve. Këto komisione miratohen paraprakisht në DAR/ZA.
  - b. Data dhe ora e zhvillimit të olimpiadës afishohet në çdo shkollë jo më vonë se një javë përpara zhvillimit të saj.
  - c. Olimpiadat zhvillohen sipas Udhëzuesit vjetor të zhvillimit të Olimpiadave Kombëtare për atë vit shkollor, i cili miratohet nga Ministri i Arsimit dhe Sportit.
  - d. Olimpiadat zgjasin tri orë. Çelësi i zgjidhjes publikohet dy orë pas mbarimit të testimit, në ambientet e shkollave në të cilat zhvillohen olimpiadat dhe në faqen elektronike të shkollës dhe të DAR/ZA-ve;
  - e. Anëtarët e komisionit të hartimit dhe vlerësimit të testeve, fillimisht duhet të deklarojnë me shkrim që nuk kanë konflikt interesi;
  - f. Rezultatet e vlerësimeve, brenda 7 ditëve u bëhen të njohura nxënësve pjesëmarrës dhe dërgohen në DAR/ZA. Në DAR/ZA, karahas rezultateve të vlerësimeve, dërgohen edhe punimet (testet) e tri vendeve të para.
  - g. Testet dhe vlerësimi i përgjigjeve të nxënësve, si dhe çdo dokument që lidhet me zhvillimin e olimpiadës, janë objekt inspektimi i ISHA dhe ruhen një vit në shkollë.
- II. *Faza e dytë* zhvillohet në nivel DAR/ZA, me nxënësit fitues, që në fazën e parë kanë marrë jo më pak se 70% të pikëve. Kjo fazë zhvillohet sipas këtyre procedurave:
- a. Testet hartohen nga AKP-ja.
  - b. Testet dërgohen me postë një ditë përpara zhvillimit të olimpiadës në DAR/ZA.
  - c. Olimpiadat zhvillohen sipas Udhëzuesit Vjetor të hartuar nga MAS, zgjatën tri orë dhe fillojnë në orën 10:00;
  - d. DAR/ZA cakton mjediset ku do të zhvillohet olimpiada dhe njofton nxënësit pjesëmarrës.
  - e. Në çdo mjedis caktohet një Përgjegjës Administrimi (PA) dhe administratorë të miratuar nga DAR/ZA përkatëse;
  - f. Përgjegjësi i Administrimit (PA) fillon identifikimin e nxënësve pjesëmarrës në olimpiadë, sipas listës së ardhur nga DAR, një orë përpara fillimit të saj;
  - g. PA u shpërndan me procesverbal administratorëve të olimpiadës, testet e nxënësve pjesëmarrës;
  - h. PA nuk lejon hyrjen e personave të paautorizuar në mjedisin ku zhvillohet olimpiada;
  - i. PA organizon ndarjen e administratorëve në klasat ku do të zhvillohet olimpiada;
  - j. Administratorët e olimpiadave duhet që të mos jenë mësues në shkollën e nxënësve fitues, si edhe të lëndës në të cilën zhvillohet olimpiada;

- k. Për çdo 15-20 nxënës duhet caktuar një administrator;
  - l. PA-të, nxënësit dhe administratorët ndalohet të mbajnë celular gjatë zhvillimit të olimpiadës;
  - m. Monitorimi i olimpiadave në këtë fazë kryhet nga AKP, MAS dhe ISHA;
  - n. Zarfi me testet e Olimpiadës hapet në kohën e fillimit të Olimpiadës nga PA, në prani të nxënësve.
  - o. Për kryerjen e procesit të sekretimit të testeve, DAR/ZA cakton administratorët e sekretimit (AS), të cilët janë trajnuar për procesin;
  - p. Sekretimi fillon pasi të ketë përfunduar shpërndarja e testeve;
  - q. Testi dhe çelësi i zgjidhjes publikohen në faqen e AKP-së.
  - r. Komisionet e vlerësimit ngrihen me vendim të DAR/ZA dhe kanë në përbërje të tyre specialistë të tyre, si edhe mësues të lëndës/ve me kualifikimin më të lartë.
  - s. Nxënësit që janë vlerësuar me mbi 70% të pikëve të mundshme, fitojnë të drejtën për të marrë pjesë në fazën e tretë të olimpiadës që zhvillohen në nivel kombëtar.
  - t. Komisioni i DAR/ZA klasifikon nxënësit fituesit në nivel DAR/ZA dhe ua komunikon shkollave.
  - u. Anëtarët e Komisionit të hartimit dhe vlerësimit të testeve, fillimisht duhet të deklarojnë me shkrim që nuk kanë konflikt interesi. Këto deklarata ruhen për një vit në DAR/ZA.
  - v. Rezultatet e përgjigjeve u bëhen të njohura nxënësve pjesëmarrës brenda 7 ditëve nga zhvillimi i Olimpiadës dhe depozitohen në DAR/ZA.
  - w. Testet dhe vlerësimi i përgjigjeve të nxënësve janë objekt inspektimi i ISHA dhe ruhen një vit në DAR/ZA.
  - x. Pas përfundimit të fazës së dytë, si dhe afatit të ankimit, sipas procedurës së parashikuar në Nenin 9, rezultatet e nxënësve fitues dërgohen zyrtarisht nga DAR/ZA në MAS, 15 ditë para fillimit të fazës së tretë të Olimpiadës për lëndët përkatëse.
- III. *Faza e tretë* zhvillohet në nivel kombëtar dhe marrin pjesë nxënësit që në fazën e dytë janë vlerësuar me mbi 70% të pikëve. Kjo fazë zhvillohet në Tiranë, ose në një qytet tjetër të caktuar nga MAS. Kjo fazë zhvillohet sipas këtyre procedurave:
- a. Hartimi dhe vlerësimi i testeve të olimpiadës/ve për nxënësit e arsimit 9-vjeçar dhe të mesëm, bëhet nga AKP-ja.
  - b. Testet e olimpiadave në këtë fazë janë të njëjta për nxënësit e klasave 10,11,12;
  - c. Testi dhe çelësi i zgjidhjes publikohen në faqen e AKP-së dhe MAS-it dy orë pas përfundimit të Olimpiadës përkatëse;
  - d. Testet sekretohen me barkod nga punonjësit e AKP-së;

- e. Në varësi të numrit të nxënësve që do të marrin pjesë në këtë fazë, AKP cakton mjediset ku do të zhvillohet olimpiada, Përgjegjësit e Administrimit (PA) dhe administratorët e propozuar nga DAR;
- f. PA kryen identifikimin e nxënësve pjesëmarrës në olimpiadë, sipas listës së ardhur nga AKP-ja, një orë përpara fillimit të saj;
- g. PA u shpërndan me procesverbal administratorëve të olimpiadës, testet e nxënësve pjesëmarrës;
- h. PA nuk lejon hyrjen e personave të paautorizuar në mjedisin ku zhvillohet olimpiada;
- i. PA organizon ndarjen e administratorëve në klasat ku do të zhvillohet olimpiada;
- j. Administratorët e olimpiadave duhet të mos jenë mësues të shkollës së nxënësve fitues, si edhe të lëndës në të cilën zhvillohet olimpiada;
- k. Për çdo 15-20 nxënës duhet caktuar një administrator;
- l. PA, nxënësit dhe administratorët nuk lejohet të mbajnë celular gjatë zhvillimit të olimpiadës;
- m. Testet dhe vlerësimi i përgjigjeve të nxënësve janë objekt inspektimi i ISHA dhe ruhen një vit në AKP.

#### Neni 7

### KRITERET DHE PROCEDURA E SHPALLJES SË FITUESVE TË FAZËS SË TRETË

Agjencia Kombëtare e Provimeve shpall fituesit e Olimpiadës, sipas këtyre kriterëve:

- a. Fitues i vendit të parë, vlerësohet nxënësi që ka fituar në rendin zbritës nga 100-80% të pikëve totale të testit.
- b. Fitues i vendit të dytë, vlerësohet nxënësi që ka fituar në rendin zbritës nga 100-70% të pikëve totale të testit.
- c. Fitues i vendit të tretë, vlerësohet nxënësi që ka fituar në rendin zbritës nga 100-60% të pikëve totale të testit.
- d. Shpallja e fituesve bëhet jo më vonë se 7 ditë nga dita e zhvillimit të Olimpiadës;
- e. AKP dërgon pranë MAS, procesverbalin me emrat e nxënësve fitues, si dhe renditjen e tyre sipas barkodeve;
- f. Përputhja e barkodeve me emrat e nxënësve bëhet në AKP në prani të përfaqësuesit të MAS-it;
- g. Emrat e fituesve të olimpiadave kombëtare, publikohen në faqen elektronike të AKP-së dhe MAS-it.

## NENI 8

### PROCEDURAT E PËRZGJEDHJES SË NXËNËSVE NË OLIMPIADAT NDËRKOMBËTARE

Për përzgjedhjen e nxënësve që do të marrin pjesë në Olimpiadat Ndërkombëtare, ndiqet kjo procedurë:

- a) Me urdhër të Ministrit të Arsimit dhe Sportit ngrihet një komision për organizimin e procedurave të përzgjedhjes së nxënësve që do të marrin pjesë në olimpiadat ndërkombëtare për shkollat 9-vjeçare dhe për shkollat e mesme. Në komision marrin pjesë specialistë të lëndëve nga AKP dhe pedagogë të propozuar nga UT.
- b) Në procedurat e përzgjedhjes së nxënësve për në Olimpiadën Ndërkombëtare për shkollat 9 vjeçare dhe të mesme, marrin pjesë nxënësit fitues në të tri fazat e olimpiadave kombëtare në lëndët përkatëse.
- c) Komisioni është përgjegjës për hartimin e testit, vlerësimin përfundimtar dhe përzgjedhjen e nxënësve që do të marrin pjesë në olimpiadat ndërkombëtare.
- d) Data e zhvillimit të testimit përzgjedhës shpallet në faqen e elektronike të MAS-it, AKP dhe njoftohen DAR/ZA.
- e) Mjedisi ku zhvillohet ky testim përcaktohet nga MAS
- f) Administrimi i testimit përzgjedhës bëhet nga MAS dhe AKP.
- g) Shpallja paraprake e fituesve bëhet e njohur në faqen elektronike të AKP-së dhe MAS-it.
- h) Shpallja përfundimtare e fituesve publikohet në websit-in e AKP-së dhe MAS-it, menjëherë pas përfundimit të afateve të ankimit dhe vendimeve të komisioni të MAS-it, i ngritur sipas nenit 9, pika (e) të kësaj rregulloreje.
- i) Anëtarët e Komisionit, si dhe gjithë pjesëmarrësit e përfshirë në proces duhet të deklarojnë që nuk kanë konflikt interesi.
- j) Në rastet kur nuk ka fitues, sipas procedurave të përcaktuara në këtë urdhër, atëherë nuk mund të ketë pjesëmarrje në olimpiadën respektive ndërkombëtare.
- k) MAS merr përsipër financimin e ekipit pjesëmarrës në Olimpiadat Ndërkombëtare, në përputhje me buxhetin e hartuar dhe të miratuar për këtë veprimtari të arsimit parauniversitar.
- l) Pjesmarrja në këto aktivitete miratohet me urdhër të Ministrit të Arsimit dhe Sportit.

## NENI 9

### PROCEDURA E ANKIMIT TË NXËNËSVE

Nxënësi ka të drejtë të bëjë ankim duke ndjekur këto hapa:

- a. Kur olimpiada, zhvillohet në nivel shkolle apo në nivel DAR/ZA-je, (faza e parë dhe e dytë), kërkesat për rishqyrtim/korrektim të vlerësimit të testit mund të bëhen:

- b. Në kërkesë duhet të specifikohen ushtrimi/et që kërkohet të rivlerësohet/n dhe numri i pikëve që mendon nxënësi se duhet të marrë në atë/o ushtrime.
- c. DAR/ZA, krijon një komision të posaçëm i cili shqyrton kërkesën e nxënësit dhe kthen përgjigje me shkrim dhe/ose elektronikisht, brenda 5 ditëve. Bashkë me përgjigjen, nxënësit i dorëzohet fotokopja e përgjigjes së testit.
- d. Në përfundim të shqyrtimit të ankesave të nxënësve dhe rivlerësimit të testit të tyre, AKP shpall listën përfundimtare të fituesve dhe e dërgon atë në MAS.
- e. Kur Olimpiada zhvillohet në nivel kombëtar, (faza e tretë), nxënësi paraqet ankimin e tij në AKP, brenda 5 ditëve nga data e shpalljes së fituesve;
- f. Për të shqyrtuar ankesat e nxënësve, MAS ngre një komision të përbërë nga specialistë të AKP, mësues të lëndëve përkatëse dhe pedagogë të propozuar nga UT.
- g. Komisioni shqyrton ankesën/at dhe vendimin përfundimtar, të firmosur nga të gjithë anëtarët e komisionit e përcjell në DAPU në MAS dhe në AKP.


#### Neni 10

### **PROMOVIMI DHE SHPËRBLIMI FINANCIAR I NXËNËSVE QË SHPALLEN FITUES TË OLIMPIADAVE KOMBËTARE DHE NDËRKOMBËTARE**

- 1) Nxënësit fitues të olimpiadave të fazës së parë, drejtoritë e shkollave përkatëse i pajisin me certifikata për vendin e fituar në nivel shkolle.
- 2) Nxënësit fitues të olimpiadave të fazës së dytë dhe të tretë, DAR/ZA-të në bashkëpunim me Drejtoritë e shkollave përkatëse, i pajisin me certifikata për vendin e fituar.
- 3) Ministria e Arsimit dhe Sportit, nxënësit fitues në Olimpiadat Kombëtare (vendi i parë, i dytë, i tretë) dhe Olimpiadat Ndërkombëtare, i pajis me certifikata për vendin e fituar.
- 4) Shpërblimi financiar i nxënësve, që shpallen fitues në Olimpiadat Kombëtare dhe Ndërkombëtare, bëhet me urdhër të veçantë të Ministrit të Arsimit dhe Sportit.

*Kjo Rregullore zbatohet, duke filluar nga viti shkollor 2014-2015.*

**LINDITA NIKOLLA**

  
**MINISTËR**

